

ma *solum* dir che'l si mandi per Collegio uno secretario da esser electo, el qual zà era stà electo, el qual parlì adì 3 del presente, et andò sul Polesine prima.

Fu posto, per li Consieri et Cai di XL, atento fossero electi per questo Conseio 5 judici sopra la causa di l' isola di Ampho, nel numero di qual fo electo sier Filippo Capello, qual è cazato intervenendo uno da chà Capello, però sia preso che li altri 4 electi possano aldir et terminar, et spazino la causa, *ut in parte*. Ave 154, 1, 3.

Fu posto, per li Savi, exceto sier Zuan Antonio Venier, expedir sier Zuan Antonio Venier electo orator al Christianissimo re di Franza, *videlicet* per spexe di mexi 4, a raxon di ducati 140 al mexe, ducati 560, *item* per cavalli ducati 150, et per forzieri et coverte ducati 30, *item* che'l dito possi portar con lui arzenti a risego di la Signoria nostra per la valuta di ducati 400 *ut in parte*. Ave 178, 91, 1. *Item* al suo secretario li siano donati ducati 50, qual è Piero di Franceschi.

Fu posto, per li Savii ai ordeni, tre galle al viazo di Alexandria, le qual debbano metter banco di 10 luglio, et partir il capitano a dì 8 avosto sotto pena *ut in parte* con le clausule solite. Ave 179, 3, 1.

144* Fu posto, per sier Tomà Donado, sier Justo Contarini, sier Domenego Venier, proveditori sora le Victuarie, una parte: atento fusse preso a dì 25 novembrio 1529 che per tutte le ville di la Signoria nostra et terre et lochi siano tenuti manzi *ut in parte*, per tanto la ditta parte sia reformada in questa forma, zoè: (Ave 175, 13, 3).

	buò tengano	
Padua et il padoan doveano tener .	3000	1200
Vicenza et il visentin	2000	1000
Verona et veronese	1500	1000
Rovigo et il Polesine	500	300
Brexà et il brexan	2000	1000
Bergamo et il bergamasco	1000	500
Crema et il cremasco	300	200
Cologna et il colognese	200	100
Treviso et il trevisan	1500	800
Udene et la Patria di Friul et li preti	2000	1400
Feltre et il feltrin	300	200
Cividal di Belun et il belunese . .	300	200
Bassan et bassanese	200	100

Summa n. 8000

Fu posto, per li Savii del Conseio et Terraferma et li proveditori sora le Vituarie: Atento le lettere del podestà et capitano di Ruigo lete a questo Conseio, la difficultà ha li nostri di la becharia andati de li a comprar carne et animali per questa terra, volendo il daziario di quelli quanto haveano al tempo quel loco era del duca di Ferrara, che si pagava 10 per 100 di dazio, et atento quelli passano per il padoan et visentin per questa cità non pagano alcuna cosa; però l' anderà parte che tutti li animali bovini et di altre sorte, porci et carne fresche et salate, che si trazerano di tutte terre et lochi nostri per questa cità, per transito, non debbano pagar alcun dazio nè angarie ne le terre nostre nè altra regalia, excetto soldi 2 per la bolletta *ut in parte*. Ave 159, 7, 4, et fu presa.

Noto. Hozi fu ordinà chiamar Conseio di X con la Zonta per lezer alcune lettere, ma per l' ora tarda il Serenissimo volse andar a caxa, et fo licentià il Pregadi.

In questo Pregadi, sier Zuan Vituri, cugnado di sier Luca Loredan, et sier Sebastian Bernardo, barba di sier Andrea Loredan, *olim* rectori a Crema, incarzeradi, ancora che stanno a caxa loro, et la sua causa pende, *videlicet* di sier Andrea Loredan, richiedendo da la Signoria che sia messa una parte, li XL Criminali, hanno compido, si reducano con li Zivili, che hora è Criminal, a expedirli. Il Serenissimo li fo contra, dicendo non vol meter queste stampe, et che venisseno da matina in Collegio, si delibereria.

A dì 2, la matina. Fo lettere da Costanti-
nopoli, di sier Piero Zen orator et vicebailo,
etiam di domino Alvise Gritti, di 3 mazo, por-
tate per uno orator del signor turco qual è zonto a
Lio. Scriveno come il Signor manda questo orator
zaus, nominato Choseim, qual è homo da conto, et
lo manda per invidar il Serenissimo et la Signoria
a le noze et circumcison di soi 4 fioli, qual si comen-
zerà a dì 20 zugno, *videlicet* Mustaphà, Mahumeth,
Selim et Baiasit, et che lo mandano *etiam* per
explorar li andamenti de l' imperator, che deside-
rano grandemente de intender. Però exorta la Si-
gnoria a expedirlo presto et honorarlo et apresen-
tarlo ben, per esser tutto del magnifico Imbraim
bassà. Nè armada per questo anno, nè altra motion
di guerra non si fa.

Fo ordinà, per Collegio, subito trovarli una caxa degna, et li fo trovato a la Zueca la casa da chà Marzello a San Zuane, et mandata a preparar, et ordinato 20 zentilhomeni lo vadi a tuor hozi a Lio et condurlo in ditta caxa et farli le spexe, tra i qual